

L'ANIVERSARI

di GIUSEPPE MARIUZ

A i 12 di Zenâr dal 1947, juste setante agns indaûr, al nassee il Movimento popolare friulano per l'autonomia regionale (Mpf). Lu veve metût sù un grop di zovins inteletuâi che al sburtave pal ricognossiment di une Region Furlane che e cjapàs dentri dut il teritori de provincie di Udin (cu la Diestre Tili-ment che i faseve part), chel che al restave de vecje provincie di Gurize e il Mandament di Puart. Compit dal Moviment al jere chel di unî, parsore dai partîts politics, dutis lis fuarcis, fin a chel moment sparnicadis, che a viodevin te autonomie regionâl la uniche garanzie par lis libertâts democratichis.

Il prin a tirâ fûr la cuistion de autonomie, come che si sa, al jere stât, subit dopo la Liberazione, Tiziano Tessitori, elet an- cje à la Assemblee Costituente tes filis de Democrazia cristiane. I firmataris dal Moviment a volevin puartâ il discors no dome jenfri lis stanzis de politiche, ma ancje framieç la int. O ricuardin che a jerin Gianfranco D'Aronco (nomenât segretari gjenerâl), Luigi Ciceri, Chino Ermacora, Alessandro Vigevani di Udin, Pier Paolo Pasolini e Zefferino Tomé di Cjasarse, Luigi Pettarin di Gurize e Attilio Venudo di Puart.

Il moment al jere just, stant che ai 18 di Dicembar dal 1946 la seconde Sot-comission dal "75" de Costituente e veve discutût su la suddivision in Regions, aprovant la "Regione Friulana" che e varès tignût dentri - cussì si veve votât - il teritori dal Friûl plui lis tieris de Vignesie Julie che cul Tratât di Pàs a saressin restadis tal Stât talian, cun esclusion dal Distret di Puart. Triest e jere pal moment fûr dal discors, par vie dal proviodût Teritori Libar. In chê volte i partîts no jerin ducj dacuardi (massime il Partît comunista) e nancje i Comuns che a varessin vût di dâ un parê. Di fat, te part ocidentâl dal Friûl diviers Comuns, scomençant di Pordenon, a volevin stâ cu la "Regione Veneto" ma ancje a Gurize nol mancjave il sospet di vignî supâts de fuarcie di Udin.

Il Moviment al rivà a movi lis aghis fin dal prin comizi al Cine Puccini, ai 19 di Zenâr. In



Il pari dal autonomisim, Tiziano Tessitori, elet anje a la Assemblee Costituente

Il sium de autonomie dal Moviment populâr furlan

Tal Zenâr dal 1947 un grop di zovins inteletuâi si jere metût adun par riunî dutis lis fuarcis che a viodevin te Region une garanzie pes libertâts democratichis

Fevrâr al jere bielzà jessût il libret *La Regione friulana* e tal zîr di pœc timp nons lustrissims a vevin dât l'adesion: olti a Tessitori, il poete Biagio Marin, il storic Pier Silverio Leicht, bons. Ivan Trinko da lis Valadis dal Nadison (o Benecja) e il president de Cjamare di Cumierç Gaetano Pietra. Intant, si jerin formadis fintremai 53 Sezioni teritoriâls, de zone di Pordenon a Gurize, di Sapade a la Basse, de Val Cjanâl ai migrants tal forest.

Tal Moviment populâr furlan si cjatavin variis animis dal front autonomist. Al è interessant viodi che lis motivazions par la autonomie a jerin sore- dut culturâls e economicis, mancun di caratar lenghistic. Dut câs, La Patrie dal Friûl di pre Josef Marchet e ospitave

FONDADÔRS E PROTAGONISCJ

Cun Tessitori D'Aronco, Ciceri Ermacora e Pasolini ancje Biagio Marin Pier Silverio Leicht e Ivan Trinko

un alegât in marilenghe dal Moviment.

Lis robis si imberdearin dopo che i comunisj a cambiarin parê, poiant une Region a statût speciâl, stant che le consideravin un teritori "mistilingue" par la presince dai slovens. Il front si crevâ par pôre dal bilenghisim e des rivendicazions de Jugoslavia. Il

Mpf, cussì come la Filologjiche, a puartarin indenat la linie che l'impuartant al jere di difindi l'autonomie intune Region Furlane, nol impuartave se ordenarie o speciâl.

Dopo che l'Assemblee Costituente tal Jugn dal 1947 e veve votât a pro de Region Friul-Vignesie Julie a statût speciâl, lis polemichis a continuarin par mès. A vignivin atacâts no dome i partîts di çampe e la mino- rance slovene, ma ancje il Mpf e il stes Tessitori; in manciance di un acuadi, in Otubar la atuazion de Region e fo rinviade cuntune "Norma transito- ria". Il fat al lassà il marum in bocje ai autonomisj. Patrie dal Friûl e protestave cuintri i furlans che no savevin fâsi valê a Rome e il Moviment populâr furlan al tentave un ricors cuin-

tri la decision dal rinviament, mancece sucès.

Intant, i tîmps a mudavin e la "Vuere frede" e cjapave dentri fuarcis politichis e culturâls. Pasolini tal Fevrâr dal 1948 si gjavave par lis "involuzioni" dal Moviment, che par altri nol veve une linie precise, pûr se dongje dai candidâts autonomisj di aree democristiane e centriste. Ma ancje i democristians si tirarin vie cuant che il Mpf al decidè, dal 1949, di partecipâ diretamentri a lis ele- zions. Si vierzè une crisi cun di- missions di masse, tant che cuant che il Moviment si pre- sentà a lis elezions amministrati- vis dal 1951 al cjapà dome un conseîr in Provincie e nissun tal Comun di Udin. Tal 1953 il Moviment al scomparì.

GRI PRODUZIONE RISERVATA

COROT

Marum pe pierdite di cuatri personaçs che a àn dât tant pe marilenghe



Tullio De Mauro

UDIN

I prins dîs di Zenâr dal an gnûf nus àn riservât il marum de pierdite di cuatri personaçs che, in diferents tîmps e situa- zions, a àn contribuît a fâ cres- si la cussience dai dirits dal Friûl e de sô lenghe.

Tullio De Mauro, il linguist forsît plui cognossût e preseât in Italie, che al è stât ancje mi- nistri de publiche istruzion, al jere vignût plui voltis in Friûl, a partî dai agns Setante dal Nûfcent cun Mario Lizzero, par sostignî lis resons di une des primis propuestis di leç minorancis linguisticis.

Al jere tornât a Udin in agns resints par presentâ il Grant di- zionari bilengâl talian - furlan e dâ conseis sul disvilup de marilenghe e sui imprescj che a coventin al di di vuê. Inte sô lungie vite professionâl di doc- cent universitari e di scritôr, ta- cade tal 1963 cul saç *Storia lin- guistica dell'Italia unita*, si jere simpri batût par slargjâ e di- fondi la cognossence lingui- stiche dal talian a nivel populâr e, tal stes timp, par mantignî vîfs i dialets e lis lenghis di mino- rance, che a insiorin la culture di un Pais biel e comples come l'Italie.

Cualchi di dopo di lui, o vin savût cun displasê che al jere mancjât il professôr Marzio Strassoldo. Come retôr de Uni- versità di Udin dal 1992 al 2001 al jere stât un pionîr de gnove riforme e un grant ino- vadôr, come che al à ricuardât il sindic Furio Honsell, deven- tât retôr dopo di lui.

Come president de Provin- cie di Udin dal 2001 al 2007, e dopo di chê esperience come fondadôr de associazion politi- che "Identità e Innovazione", Strassoldo al veve sburtât par une autonomie dal Friûl dal pont di viste amministrati- f, culturâl e economic.

Al jere inmo conseîr de So- cietàt Filologiche Furlane e president de Societàt Sienti- fiche e Tecnologiche Furlane.

Nus à lassâts a 57 agns ancje Alberto di Caporiacco, che dal pari Gino al veve supât l'amôr pe storie e culture de sô tiere e soregut pe sô autonomie.

Al jere stât preseât come as- sessôr ae culture al Comun di Udin e par batais politichis là che no si sparagnave, ancje a cost di polemichis e scuintris judiziaris. Par ultin, o vin pier- dût pre Meni Zannier.

Di lui o fevelarìn plui a larc su la prossime pagjine Mari- lenghe. (r.f.)

GRI PRODUZIONE RISERVATA

GRI PRODUZIONE RISERVATA

ART DAL NÛFCENT

Italico Brass, partide di briscule



■ Italico Brass (Gurize 1870 - Vignesie 1943) al fo plui voltis pre- sint a la Bienâl e al tignî mostris tes grandis citâts di Europe. Ta chest cuadro nus puarte dongje la atmosfere di une partide di briscule. E noaltris si domandin: sono ancimò ostariis ta chest mont? (g.e.)

TRADIZIONS

Lis Calendis e i segns di San Pauli

di Mario Martinis

La magjie principâl dal mès di Zenâr, cence dubi, e jere tes Calendis (o mesâis), tradi- zion sapienziâl di caratar me- teorologic difondude in buie part de Italie setentrionâl e une vore inlidrisade in Friûl. Jenfri lis diviersis crodincis e lis praticis populârs divina- toris, ancje in Friûl a jerin des usancis che a vevin a ce fâ cu lis previsionis dal timp, ven a stâi i mudaments atmosferics tes cuatri stagjons dal an, ce- tant utilis di cognossi par sta- bilit i moments plui juscj pes seminis, cerpiduris, racuelts, incalms, trasformazions e conservazion dai prodots e in gjenerâl par dutis lis voris

agrariis. Il pronostic principâl sul timp al stave juste apont tes Calendis che, se ben fat, nol podeve falâ.

La prevision des Calendis si formave tai prins 24 dîs di Ze- nâr. Ai prins dodis dîs a corispuindevin i corispetifs mès dal an (di Zenâr a Dicembar), biel che pai 12 dîs dopo i mès corispetifs a jerin contâts par ledrôs. Cussì il 13 di Zenâr al corispuindeve a Dicembar, il 14 a Novembar e vie inde- vant, fin al 24 che al corispuindeve di gnûf a Zenâr.

Di chest dopli cont conti- nuât e ven fûr la detule "lis ca- lendis prime a van indevant e po indaûr". Secont la tradi- zion, se il timp tai doi dîs che a corispuindevin a un ciert mès

in dutis dôs lis schiriis (par esempi il 3 e il 22 di Zenâr che a corispuindevin al mès di Març) al jere compagn biel o ploiôs, si pronosticave che tal mès indicât il timp al sarès stât ancjetant biel o ploiôs, biel che se i dâs a jerin in con- trast il timp al sarès stât varia- bil.

Par ultin, la prevision e vi- gnive confermade o dineade dai "segns" di San Pauli, ven a stâi dal timp dai 25 di Zenâr, fieste de Conversion dal apue- stul.

Se la albe di chê zornade e jere serene, la prevision e sa- rès stade confermade, se inve- zit e jere scure di nûi o s'al ploveve, e vignive ribaltade.

GRI PRODUZIONE RISERVATA

GRI PRODUZIONE RISERVATA